

Umhverfisstefna
Þjóðkirkjunnar
og umhverfisstarf í söfnum



Kirkjuþing 2009 staðfestir eftirfarandi umhverfisstefnu og áætlun um umhverfisstarf í söfnuðum og stofnunum þjóðkirkjunnar og felur kirkjuráði að fylgja eftir framkvæmd hennar.

Lífið og tilveran öll er sköpunarverk Guðs. Allt sem Guð skapar er gott og viðheldur lífinu, elur og nærir. Lífið er heilagt og hefur eigið gildi. Guð felur manningum að vera ráðsmaður sköpunarverksins og um leið er hann hluti þess. Þeirri köllun er honum ætlað að sinna af umhyggju og virðingu fyrir því sem lifir og grær. Lotning fyrir höfundu sköpunarverksins leiðir til ábyrgðar gagnvart því lífi og náttúru sem hann skapar. Frammi fyrir hinu sístæða sköpunarverki erum við hvött til að vera samverkamenn Guðs í að skapa betra líf og réttlátari heim.

Lifnaðarhættir mannkyns á síðustu öldum hafa valdið röskun á náttúru jarðar.

Þessar breytingar kalla á, að við endurskoðum þá lifnaðarhætti og gildismat, vinnum gegn ofneyslu og sóun og greiðum veg ráðdeildar og virðingar.

Íslenska þjóðkirkjan er aðili að stefnumótun Alkirkjuráðsins og Lúterska heimsambandsins er lýtur að umhyggju fyrir náttúrunni. Í því felst hvatning til þess að söfnuðir og stofnanir kirkjunnar leggi sitt að mörkum í mótun samfélags og lífsháttá sem stuðla að hófsamari og að réttlátari skiptingu jarðargæða, að vinna gegn fátækt og neyð.

Í samræmi við það vill þjóðkirkjan leggja sitt að mörkum með því að:

1. boða hógværd og látleysi í lífsstíl og neyslu
2. uppörva einstaklinga og samfélag í því að auðsýna ábyrgð í umgengni sinni um jarðargæði
3. vinna gegn sóun og ofneyslu
4. leggja sig fram um að hlynna að lífi og náttúru
5. stuðla að sjálfbærri nýtingu jarðargæða, nýtni, orkusparnaði og endurvinnslu.



Til að framfylgja þessari stefnu mun Biskupsstofa leita samstarfs við presta og söfnuði, stofnanir og félagasamtök um eftirfarandi verkefni:

- útgáfa glöggra og einfaldra leiðbeininga um orkunotkun, sorpflokkun, endurvinnslu, o.þ.h.á vettvangi sókna og stofnana kirkjunnar
- útgáfa „Ljósaskrefsins“ – handbókar kirkjunnar fyrir umhverfisstarf
- umhverfisfræðsla í söfnuðum og kirkjumíðstöðvum
- þátttaka í almennu umhverfisstarfi í samfélaginu – umhverfisdagatal
- að nýta „Fair trade“ vörur þar sem þess er kostur
- halda úti vefsvæði með upplýsingum, hjálparefni um umhverfismál og tenglum við erlendar samstarfsstofnanir.

Ljósaskrefið

– hagnýtt umhverfisstarf í söfnuðum

Ljósaskrefið nefnist handbók Þjóðkirkjunnar fyrir umhverfisstarf í söfnuðum. Með útgáfu hennar eru söfnuðir og stofnanir Þjóðkirkjunnar hvattir til að koma á skipulögðu umhverfisstarfi innan vébanda hennar.

Einnig að stuðla að umræðu innan safnaðar og starfsfólks um hlutverk safnaðar/ kirkju í málefnum tengdum sjálfbærri þróun.

Markmiðið er að umhverfisstarfið tvinnist inn í daglega starfsemi kirkjunnar. Starfið felur í sér fræðslu- og umræðufundi til að hvetja til almennrar þátttöku í verkefninu. Sett eru markmið og unnið að úrbótum ásamt því sem haldin er þemaguðsþjónusta.

Til að starfið sé markvisst er unnið út frá þessari handbók Ljósaskrefinu. Þar eru sett markmið um úrbætur í málaflokkum sem við eiga hverju sinni ásamt gátlista í handbókinni. Líta skal á gátlistann sem hugmyndir en ekki tæmandi lista. Markmið, ábyrgðaraðili og framvinda fyrir hvern málaflokk eru síðan skjalfest til að halda utan um umhverfisstarfið.

Ljósaskrefið er upprunnið í umhverfisstarfi sænsku kirkjunnar til notkunar í einstökum söfnuðum og hefur gefið góða raun þar í landi.

Rafrænt eintak af handbókinni er aðgengilegt á www.kirkjan.is/umhverfismal en þar er að finna margvíslegt efni um umhverfismál.





ÞJÓDKIRKJAN

WWW.KIRKJAN.IS